

आकाशवाणी

खबरां

1. प्रधानमंत्री नरेंद्र मोदी ते रूस दे राष्ट्रपति व्लादिमीर पुतिन बश्कार अज्ज फोन पर गल्लबात होई। मोदी होरें आखेआ जे भारत सदा थमां रूस ते यूक्रेन बश्कार संघर्ष दे रमानदारी नै नबेडे दा हिमायती रेहा ऐ।
2. यूक्रेन दे राष्ट्रपति वोलोदिमीर जेलेस्की हुंदी अज्ज अमरीकी राष्ट्रपति डोनाल्ड ट्रम्प कन्नै मलाटी होने आहली ऐ जेदे च केई यूरोपी नेता बी शामिल होडन।
3. संसद दे दौनें सदनें दी कार्यवाही बरोधी धडें दी डंड रौली दे चलदे कल्लै तोड़ी स्थगित, राज्यसभा च भारती बंदरगाह विधेयक 2025 पास।
4. सरकारै आखेआ ऐ जे नकली कीडे मार दोआइयां, नकली हैल ते नकली बी तैयार करने आहली कंपनिएं खलाफ सख्त कार्रवाई कीती जाग।
5. जम्मू-कश्मीर कोला लेइयै हिमाचल प्रदेश, उत्तराखंड, पच्छिम बंगाल, ओडिशा, आंध्र प्रदेश ते महाराष्ट्र च भारी बरखें कारण आम जनजीवन पर माडा असर।



PM Putin-Talks

प्रधानमंत्री नरेंद्र मोदी ते रूस दे राष्ट्रपति व्लादिमीर पुतिन हुंदे बश्कार अज्ज फोन पर गल्लबात होई। सोशल मीडिया पोस्ट च मोदी होरें अलास्का च अमरीकी राष्ट्रपति डोनाल्ड ट्रम्प हुंदे कन्नै अपनी हालिया मलाटी बारै जानकारी सांझी करने लेई पुतिन हुंदा धन्नवाद कीता। मोदी होरें आखेआ जे भारत यूक्रेन संघर्ष दे शांतिपूर्ण नबेडे दा उप्परोतली आहवान करदा रेआ ऐ। प्रधानमंत्री होरें आखेआ जे भारत इस दिशा च कीते जाने आहले सब्भनें जत्तें दा समर्थन करदा आया ऐ।

<><><><><><>

US-Prez.

तोआई, अमरीकी राष्ट्रपति डोनाल्ड ट्रम्प होरें यूक्रेन दे राष्ट्रपति वोलोदिमीर जेलेन्स्की हुंदे पर दबा बनांदे होई उनेंगी सुझा दित्ता जे ओहू रूस आसेआ कब्जाए गेदे किश इलाकें पर अपना दावा छोड़ी देयै। जेलेन्स्की हुंदी अज्ज ट्रम्प हुंदे नै मलाटी होने आहली ऐ जेदे च कई यूरोपीय नेताएं दे शामिल हेने दा बी कार्जक्रम ऐ। ट्रम्प होरें कल इक सोशल मीडिया पोस्ट च मेद प्रगट कीती ही जे यूक्रेन उन्दे आखने पर रूस कन्नै लड़ाई तुरत बंद करी देग जेकर ओहू शांति चाहंदा ऐ तां नेही तां उसी इसै चाल्ली लम्में चिरै तोड़ी संघर्ष करना पौग कीजे रूस इक मजबूत मुल्ख ऐ ते लम्में चिरै तोड़ी ओहदा मकाबला करना यूक्रेन दे बस दी गल्ल नेही।

<><><><><><>

Gaza-Relocation

फिलीस्तीन दे आतंकी गुट हमास नै गाजा थमां लोकें गी हटाने दी इस्राइल दी योजना गी नामंजूर करी दित्ता ऐ। हमास नै आखेआ ऐ जे एहदे नै नरसंहार दा नमा दौर शुरू होग ते ज्हारें लोकें गी अपना घर-बाहर छोड़ियै जाना पौग ते उंदी बड़ी मती खज्जल खोआरी होग। हमास नै इस्राइल पर गलत मंशा कन्नै दक्खनी गाजा च केंप लाने ते आसरमें दी बवस्था करने दा आरोप लाया ऐ। उन्नै आखेआ जे एहू नागरिकें खलाफ अपराध दी इक सोच-समझी दी साजिश ऐ। तोआई इस्राइली सेना दा आखना ऐ जे ओहू दक्खनी क्षेत्र च सुरक्षित थाहरें तगर नागरिकें गी पुजाने दी कोश्ट करा'रदा ऐ।

<><><><><><>

Chinese FM

चीन दे विदेशमंत्री ते कम्युनिस्ट पार्टी पोलितब्यूरो दे मिम्बर वांग-यी होर अज्ज संझा नमी दिल्ली पुज्जी गे न। दं'ऊ दिनें दी भारत यात्रा पर राष्ट्रीय सुरक्षा सलाहकार अजीत डोभाल हुंदे साहे पर उन्दी

एह यात्रा होआ करदी ऐ। चीन दे विदेशमंत्री भारत दे विशेष प्रतिनिधि डोभाल हुंदे कन्नै भारत-चीन बश्कार बन्ने गी लेइयै चलदे आवा रदे- विवाद पर विशेष प्रतिनिधिमंडल स्तरै दी गल्लबात दे 24में गेड़ च हिस्सा लैगन। विदेशमंत्री डाक्टर एस. जयशंकर हुंदे कन्नै बी चीनी विदेशमंत्री हुंदी दपक्खी बैठक लग्गने दा कार्जक्रम ऐ।

<><><><><><>

Parl-Adjourned

संसद दे दौनें सदनें दी कार्यवाही अज्ज बक्ख-बक्ख मुद्दे गी लेइयै बरोधी धड़ें दी डंड-रौली दे चलदे दिन भरै लेई स्थगित करी दित्ती गेई ऐ। लोकसभा दी कार्यवाही पैहले 2 बारी स्थगित होने दे बाद जिसलै 2 बजे परतिए शुरू होई तां स्पीकर ओम बिरला होरें पूरे सदन दी तरफा अंतरराष्ट्री अंतरिक्ष केंद्र थमां होइयै परतोए दे भारती ब्हाई फौज दे ग्रुप कैप्टन शुभांशु शुक्ला होरें गी ममारकबाद दित्ती। तोआई, बरोधी धड़ें दे रौले रप्पे दरान गै विज्ञान ते टेकनालजी मंत्री डॉ. जितेंद्र सिंह होरें चर्चा शुरू कराई। ओल्लै सदन दी अध्यक्षता करा'रदे दिलीप सैयकिया होरें बरोध प्रदर्शन करा'रदे सदस्यें गी बार-बार अपील कीती जे रौला नेई पान ते सदन दी कार्यवाही चलन देन, पर उन्दे बार-बार ठाकने दे बाद बी जिसलै ओहू आक्खे नेही लग्गे तां सदन दी कार्यवाही दिन भर लेई स्थगित करनी पेई। इससै चाल्ली दा नजारा राज्यसभा च बी दिक्खने बी लब्बा ते उप्परले सदन दी कार्यवाही च बार-बार विघ्न पोने पर दपैहरी मगरा एहदी कार्यवाही बीकल्लै तगर अगड़ी पाई दित्ती गेई' पर एहदे कोला पैहले राज्यसभा च भारती बंदरगाह विधेयक-2025 गी पास करी दित्ता गेआ।

<><><><><><>

Agri Minister

राई-बाई ते मरसानें दी भलाई-बेहतरी सरबंधी केंद्री मंत्री शिवराज सिंह चौहान होरें आखेआ ऐ जे नकली कीड़े मार दोआइयां, नकली हेल ते नकली बी तैयार करने आहिलियें कंपनीं खलाफ सख्त

कार्रवाई कीती जाग। मंत्री होर मध्य प्रदेश च नकली दोआई दा छिडकाह करने करी तबाह होई दी सोयाबीन दी फसल दे नुकसान दा जायजा लैने लेई उत्थे गेदे हे। शिवराज सिंह चौहान होरें गी शकैतां थहोइयां हियां जे गैर जरूरी घाह-बरूट ते जड़ी खत्म करने लेई इस्तेमाल कीती गेदी दोआई दे छिडकाव कारण सोयाबीन दी फसल गी नुकसान पुज्जा ऐ जेदे बाद उनें प्रभावित खेत्तरें दा मुआयना कीता। उनें 2 प्रभावित जिलें, विदिशा ते रायसेन दा दौरा लाया ते आखेआ जे इस चाल्ली दिएं कंपनीं खलाफ इक बड्डा अभियान चलाइयै सख्त कार्रवाई कीती गेई। मंत्री हुंदे निर्देश पर भारती कृषि अनुसंधान परिषद आई.सी.ए.आर नै इक कमेटी दा गठन कीता ऐ। प्रभावित खेत्तरें च जाइयै नुकसान दा जायजा लैगा।

<><><><><><>

Student-Safety

शिक्षा राज्यमंत्री जयंत चौधरी होरें आखेआ ऐ कि सरकार स्कूलें च बच्चें दी सुरक्षा कन्नै लापरवाही गी दना बर्दाश्त नेई करोगा। प्रश्नकाल दरान जिमनी सोआलें दा परता दिंदे होई मंत्री होरें आखेआ जे सब्भनें राज्यें ते केंद्र शासित प्रदेशें गी ते स्कूलें दे बोर्डें गी बी इस बारै दिशा-निर्देश जारी कीते जंदे ना उनें दस्सेआ जे शिक्षा मंत्रालय नै हाल च गै सब्भनें राज्यें ते केंद्र शासित प्रदेशें गी बी चिट्ठी लिखी ऐ।

<><><><><><>

Chhatisgarh

छत्तीसगढ दे बस्तर प्रांत दे बीजापुर जिले च अज्ज माओवादिएं आसेआ कीते गेदे आई.ई.डी धमाके च इक सुरक्षाकर्मी शहीद होई गेआ ते 3 जवान जखमी होई गेन। एह धमाका उत्थूं दे नेशनल पार्क इलाके च उसलै होआ जिसलै जिला रिजर्व गार्ड बल दी टीम नक्सल रोधी कार्रवाई तैहत उत्थै गेदे हे। घायल कर्मिं दी हालत खतरे शा बाहर दस्सी जा'रदी ऐ।

<><><><><><>

Delhi-Blast Threat

राजधानी दे कई स्कूलें गी अज्ज बम दी धमकी मिली। अग्निशमन विभाग नै दस्सेआ जे उनेंगी ते स्कूलें गी कुल 32 कॉल ते धमकी भरोचे दे ईमेल मिले ना। धमकी मिलने पर अग्निशमन विभाग नै तुरत स्कूल पुज्जियै उत्थे मौजूद पुलिस दी सहायता कीती। तोआई, कई स्कूलें च अज्ज छुट्टी करी दिती गई ते मां-पेयो गी अपने बच्चें गी घर लेई जाने दा अनुरोध कीता। दिल्ली दे डिप्टी चीफ अग्निशमन अधिकारी ए.के मलिक होरें दस्सेआ जे एहू सब्बे धमकियां झूठियां हियां। उनें दस्सेया जे सब्बे कॉल सबेरे सत्त बज्जियै 24 मिनटें थमां औन लगी पे हे।

<><><><><><>

Wrestling

भारती पलोआन विशाल, बुल्गारिया च आयोजित फ्री स्टाइल अंडर ट्वेंटी विश्व चैंपियनशिप च कैह दे तगमे लेई मकाबले च उतरडन। एहदे शा पैहले विशाल गी युनाइटेड वर्ल्ड रेस्लिंग दे मैगोमेदगादजी मैगो मेदोव कोला हार दा सामना करना पेआ ऐ।

<><><><><><>

Khelo India

औंदी 21 थमां 23 अगस्त तोहड़ी श्रीनगर दी मशहूर डल झील च आयोजित कीते जाने आले खेले इंडिया वाटर स्पोर्ट्स फेस्टिवल -2025 दी मेजबानी लेई जम्मू-कश्मीर पूरी चाल्ली तैयार ऐ। इस उत्सव दा मकसद जम्मू-कश्मीर दी सगोसार संस्कृति, दस्तकारियें ते सैलसफा समर्थ दा प्रदर्शन करना ऐ ते एहदे च तकरीबन 800 खडारी, कायाकिंग, कैनोइंग, रोइंग ते इस चाल्ली दे होरनें मुकाबलें च अपना दम-खम दस्सडन। सरबंधत अधिकारियें गी निर्देश दिते गे न जे ओहू सब्बै लोडचदी स्थूलतां ते सुरक्षा वबस्था जकीकी बनान। इस उत्सव दा उदघाटनी समारोह बड़ा शानदार होग ते एहदे च ड्रोन-शो, लोक नाच ते मकामी दस्तकारियें दा प्रदर्शन कीता जाहगा। जम्मू-कश्मीर

खेडु काउंसल ते युवा मामलें सरबंधी मंत्रालय आसेया आयोजित एह उत्सव- जम्मू-कश्मीर दे कुदरती छलैपे ते खेडुं सरबंधी जज्बें गी उजागर करोग।

<><><><><><>

Weather

मौसम विभाग नै औंदे 7 दिनें दौरान गोवा- महाराष्ट्र ते गुजरात च मौलेधार बरखा बरने दी पेश गोई कीती दी ऐ। मैहकमे नै आक्खेया ऐ जे मंगलवार 19 तरीक तगर कोंकण ते गोवा- मध्य-महाराष्ट्र दे घाट इलाके च तेज बरखा बरने दी संभावना ऐ। अगले किश दिनें तगर दक्खन प्रायद्वीपीय भारत च बी मौलेधार बरखा जारी रौहग- जेदे च अज्ज तेलंगाना च तेज बरखा होग। समुन्द्री कंडे आहले कर्नाटक दे हिस्सें च अगले दौंऊ दिनें दौरान तेज बरखा बरने दा अंदाजा लाया गया ऐ। भारत दे मते सारे राज्यें च एल्लै मौसमी हालात चिंता आहले बने देन। जम्मू-कश्मीर, पंजाब, हिमाचल प्रदेश, उत्तराखंड, पच्छिम बंगाल, ओडिशा, आंध्र प्रदेश ते महाराष्ट्र च भारी बरखा करी आम जनजीवन प्रभावित ऐ ते कई राज्यें च लोकें दी सुरक्षा लेई रेड अलर्ट जारी कीता गेआ ऐ।

<><><><><><>

Mumbai/Odisha Weather

ओडिशा दे केई जिलें च भारी बरखा होआ करदी ऐ। मौसम विभाग नै राज्य दे दक्खनी इलाकें ते आंध्र प्रदेश लेई रेड अलर्ट जारी कीते दा ऐ। अगले 24 घंटे दुरान बी स्थिति इस्सै चाल्ली दी बनी रौहने दे असार दस्से गे ना। तोआई, मुम्बई च बी भारी बरखा कारण मते सारे इलाकें च पानी किट्टा होने कारण लोकें गी मतिएं दिक्कतें दा सामना करना पवा'रदा ऐ।

<><><><><><>

Rescue Op Chashoti

जम्मू-कश्मीर च भारी बरखा ते मुश्कल इलाके दे बावजूद किश्तवाड़ दे चशोती ग्रांऽ च बद्दल फट्टने मगरा मलबे हेठ दबोए दे लोकें गी कड्डने दा कम्म जारी ऐ। बचाऽ टीमां कई सारी थाहरें पर खास करी लंगर दे कोलकाल आहली थाहरें पर मती तवज्जो देआ'रदियां न। इस तपाशी अभियान च मशीनें दे अलावा खोजी कुत्तें दी बी मदद लैती जा'रदी ऐ। 14 अगस्त गी मचेल माता मंदर कश बद्दल फट्टने दी घटना पेश आई ही जेदे च 61 लोक मारे गे जेदे च C.I.S.F दे 3 कर्मी ते इक S.P.O बी शामिल ऐ। इस घटना च 100 थमां बद्द लोक घायल होए हे।

<><><><><><>

LG-Deputation Order

उपराज्यपाल मनोज सिन्हा होरें किश्तवाड़ जिले दे चशोती ग्रां च बद्दल फट्टने मगरा जारी राहत ते बचाव अभियानें दी निगरानी करने लेई 4 वरिष्ठ आई.ए.एस अफसर ते 4 आई.पी.एस अफसरें गी तैनात कीता ऐ। सरकारी हुकमै मताबक एह अधिकारी कल्लै थमां लेइयै 26 अगस्त तोड़ी तय कार्यक्रम साब्वै कम्में दी निगरानी करंगन। 19 ते 20 अगस्त गी गृह विभाग दे प्रधान सचिव चंद्रशेखर भारती हुंदे कन्नै सेवाएं ते कारवाइयें सरबन्धी पुलस महानिरीक्षक उत्तम चंद होर ड्यूटी पर होंगन। 21 ते 22 अगस्त गी लोक निर्माण मैहकमे दे प्रधान सचिव अनिल कुमार सिंह ते आईजीपी सिक्थोरिटी सुजीत कुमार होर ड्यूटी पर रौहंगन। एहदे मगरा 23 ते 24 अगस्त गी जल शक्ति मैहकमें दे वित्त आयुक्त ते अतिरिक्त मुख सचिव शालीन काबरा हुंदे कन्नै आईजीपी ट्रैफिक एम. सुलेमान चौधरी होर होंगन ते अखीरै च 25 ते 26 अगस्त गी विज्ञान ते टेकनालजी मैहकमे दे सचिव शाहिद इकबाल चौधरी हुंदे कन्नै आईजीपी इकबाल चौधरी हुंदे कन्नै आईजीपी रेलवे विवेक गुप्ता होर राहत ते बचाव कम्में दी निगरानी करंगन।

<><><><><><>